

KASTOMARI LEN REGISTRESEN

NOKEN TINGTING LO REGISTARIM PLES GIRAUN BILONG YU

1. Hevi bilong giraun em i bikpela tru

Giraun emi wanpela bikpela samting stret long Papua New Guinea, na Mama Lo bilong kantri i banisim olgeta giraun na putim long han bilong yumi ol lain long peles.

Komiti bilong kamapim Mama Lo (Constitutional Planning Committee) i tok:

- i) Long kamapim gutpela sindaun bilong olgeta manmeri, yumi mas lukautim ol lo we emi banisim olgeta giraun na putim long han bilong ol lain bilong peles;
- ii) Pasin bilong bosim giraun na yusim ol risos istap long giraun ino bilong yu long nau tasol. Tumbuna ibin givim giraun long han bilong yu long lukautim na givim igo long ol lain i kamap bihain long yu;
- iii) Imas igat strongpela luksave na was long ol giraun na ol man bilong narapela kantri ino ken gat bikpela toktok antap long kisim giraun bilong yumi.

2. Giraun long peles em bikpela samting tru

Giraun long peles ino bilong wanpela man tasol. Ol famili o klen ilukautim istap bilong givim igo long ol tumbuna ikam bihain.

Giraun i givim yumi strong na mekim sindaun bilong yumi gutpela. Em isave givim kaikai long 7 million manmeri long olgeta dei, na giraun save givim ol samting bilong wokim haus, ol kainkain rot bilong kisim moni. Na tu olgeta taim yumi ken go bek long giraun bilong yumi na stap gut long peles.

Long wanwan yia, giraun bilong yumi i sapotim yumi long moni mak olsem K40 billion.

Pasin bilong tumbuna, bilip, na kastom tu i givim strong long ol manmeri na ol i pas wantaim giraun bilong ol.

Giraun long peles i bungim ol komuniti na mekim ol i sanap strong wantaim.

3. Registarim Giraun em wanem samting?


Gavman i kamapim na bihainim dispela tingting long mekim giraun bilong yumi ikamap samting nating.

Giraun bai kamap wankain olsem ol samting bilong salim. Ol bikpela kampani ken mekim moni long en na iken rausim ol papa mama giraun long giraun bilong ol. Registarim giraun em tingting bilong gavman long givim giraun igo long ol narapela man bilong narapela kantri olgeta. Gavman bilong yumi ino skelim na tingim ol papa giraun na ol bagarap ol bai kisim. Em i tingim tasol ol lain long narapela kantri.

Taim u registarim giraun, wanwan klen bai tokaut long giraun mak bilong ol yet. Dispela tokaut nau bai stap ples klia long ol narapela long luksave. Na tu em bai painim aut husait tru i papa bilong giraun na putim igo long pepa.

Taim u registarim giraun:

- i) Ol i ken salim, o baim olsem stoa kaikai
- ii) Hevi bilong giraun bai ol i stretim long lo na kot bilong gavman
- iii) Kainkain man i ken faulim yumi na kam stilim giraun, kain olsem long ol Special Agriculture Business Leases (SABL).
- iv) Yumi ino moa papa mama giraun, na ol pikinini bihain ino inap kisim giraun bilong yu nau. Ol klen o kominiti bai ino inap papa long giraun tu, bilong wanem dispela giraun bai stap long nem bilong wanpela man o wanpela grup tasol na yumi olgeta bai nogat tru.



4. Ol bikpela hevi bilong registarim ples giraun

- A. Taim u registarim giraun, emi rausim ol bikpela hap tingting insait long Mama Lo bilong yumi. Em bai mekim ol manmeri kamap rabis, em bai kamapim les pasin na pasin bilong wetim ol narapela lain long halivim. Pasin nogut, na birua namel long man na meri bai go bikpela moa. Ol bus, giraun, wara, kastom long ples bai bagarap olgeta.
- B. Registarim giraun emi no gutpela long sindaun bilong ol manmeri long ples. Ol i save stretim sindaun bilong ol na i save mekim moni long ol gaden kaikai na long ol narapela samting ol planim long giraun bilong ol yet. Taim giraun istap yet long han bilong ol manmeri long ples, ol iken mekim bikpela moni tru long wanwan yia.
- C. Registarim giraun bai sotim giraun long ples. Ol komuniti bilong yumi i wok long kamap bikpela wantaim planti pikinini, olsem na yumi mas tingim dispela na holim strong giraun bilong yumi.
- D. Registarim giraun bai bagarapim olgeta gutpela pasin na kastom bilong yumi. "Pasin Melanesia" na "Pasin PNG" em i pas wantaim giraun bilong yumi. Taim yu registarim giraun, em bai bagarapim gutpela sindaun we ol manmeri long ples igat.
- E. Registarim giraun i kamapim planti faul pasin pinis, na iwok long go bikpela moa yet. Igat ol wok painim aut pinis long dispela bikpela hevi long PNG long kainkain faul pasin long we ikamap long ol giraun. Yumi noken bilip long gavman nau long lukautim giraun bilong yumi.

5. Bai yumi mekim wanem nau?

Tingting bilong gavman nau long kamapim lo long salim giraun ino stret olgeta. Dispela ino wankain olgeta olsem tingting bilong ol papa mama graun, we giraun em laif bilong ol. Bikpela hevi nau long stretim em long wok bilong gavman we igat faul na stil pasin insait long gavman sistem long faulim giraun bilong gavman, na ol risos long ples.

Gavman nau imas:

1. Strongim National Goals na Directives insait long Mama Lo, bihainim tingting bilong Wok Skelim bilong Mama Lo (General Constitutional Review) ol bin mekim long 1985.

2. Rausim dispela tupela lo, Land Act na Land Registration (Customary Land) Act, na rausim Gavman Dipatmen bilong Lands. Bihain nau yumi ken kamapim nupela wei bilong lukautim giraun long halivim olgeta pipol inap ol wokman meri na moni.

3. Luksave long wei ol papa mama giraun ibin givim giraun bilong ol igo long ol skul na sios. Dispela wei bilong ples long givim giraun i moa gutpela na iwinim pasin bilong salim o kisim giraun bihainim tingting bilong ol waitman.

4. Kamapim nupela lo long:

- Strongim toktok long noken rausim giraun long han bilong ol manmeri long ples
- Givim olgeta pawa bilong pepa wok long giraun na wok bilong stretim toktok wantaim ol papa giraun igo bek long wanwan provins, na lukautim dispela wok gut wantaim

5. Kot imas tok nogat na tambu long salim ol giraun long ples?

6. Rausim Special Agriculture Business Leases (SABL)

7. Rausim Komiti bilong lukautim ol haus (National Housing Commission) na Kampani bilong lukautim ol haus (National Housing Estates Limited) bilong gavman, na kamapim nupela opis we olgeta wok bai ron stret na stap long ples klia. Dispela nupela opis bai wok long lukautim ol haus na ol bisnis bilong giraun bilong gavman.



Ol bikpela bisnis olsem kopii iken sapotim ol komuniti na ino nid long registarim giraun .